

LIZARRA-GARAZIKO AKORDIOA. Hitzarmenaren hirugarren urteurrena gogora ekarri du Mahai Nazionalak Garazin



BOB EDME
Loren Arkotxa, Arnaldo Otegi, Xabi Larralde eta Batasuneko Mahai Nazionaleko gainerako kideak.

LANKIDETZA

Korsikarrak Euskal Herrian

Korsikar ordezkariak batek hitzaldia eskainiko du bihar arratseko 20:30ean Uztaritzen, Lapurdi gelan. Estaturik gabeko nazioak, Europaren egituratzea eta gatazken aterabidea aztertuko dituzte. François Sargentini Independentzako bozeramailea eta Jean-Paul Romiti Corsica Nazioneko hautetsia izanen dira Koldo Gorostiaga eta Xabi Larralderen ondoan.

ARNALDO OTEGI

Batasuneko bozeramailea

«Eztabaida bat abiatzen denean, denek Lizarra-Garazik jarri zituen zutabeak hartzen dituzte abiapuntutzat»

Alderdi politiko guztiei bilkuretarako gonbita egingo die Batasunak

Bakoitzaren egoeraren «diagnosia eta azterketa politikoa» elkarri jakinaraztea nahi du

Eneko Bidegain | DONIBANE-GARAZI

Ospe handiz bildu ziren duela hiru urte, Donibane-Garaziko herriko etxean, Lizarrako akordioaren izenpetzaileak. Lizarra-Garaziko akordioa bataiatu zuten gela berean ekarri zuten gogora gertakari hura Batasuneko Mahai Nazionaleko kideek atzo. Aldi honetan «proposamen zehatz bat egitera» etorri ziren.

Batasunak alderdi politiko, sindikatu eta giza eragileekin errolda baten abiatzea proposatu zuen atzo. «Alderdi politiko guztiei helaraziko diegu gonbita mahai batean biltzeko, banaka edo batera», jakinarazi zuen Arnaldo Otegi. «Euskal Herriak behin betiko beste estatus bat lortzeko bidean ados» jartzea litzateke bilkura horien funtsa.

Batasunak heldu den astetik goiti «gutun bidez planteatuko du bilkuraren beharra». Bilkura horietan, «bakoitzak egungo egoerari buruz egiten duen diagnosia eta azterketa» jakinarazi nahi diote elkarri. «Inkomunikazio» egoeratik ateratzea baitezpadakotzat jo zuen Otegi. «1998an ireki prozesua abian dago oraindik ere. Momentua da gauzak argi eta garbi planteatzeko», adierazi zuen. «Horretan sinesten dutenek herriari aukera bat ematea» da Ba-

tasunaren proposamena. «Euskal Herriari bideak jarri behar zaizkio hitza emateko eta erabakiak hartzeko. Horrek izenabizenak baditu: autodeterminazioa». Otegiarentzat hori da Lizarra-Garaziko akordioaren «hirugarren fruitua».

Akordioaren hiru fruituak

Lehen «fruitua» zen «Euskal Herriak behar duen eta merezi duen estatutua» ukan dezan onartzea. «Bigarren fruitua

orain» sentitzen du Otegi. Hau da, «eztabaida politiko nazionalan ez dago planteatzerik edozein gogoeta politiko Lizarra-Garazik planteatu zituenetik kanpo. Eztabaida bat abiatzen denean, denek Lizarra-Garazik jarri zituen zutabeak hartzen dituzte abiapuntutzat», eta horregatik pozik agertu zen Batasuneko bozeramailea. «Mundu guztiak onartu du, bi estatuek izan ezik, Euskal Herriak gatazka politikoa daukala. Estatuak

kenduta, inork ez du ukatzen negoziazioan gaintitu behar dela», gaineratu zuen Otegi.

Xabi Larralde Mahai Nazionaleko kideak Frantziako Estatuaren jarrera kritikatu zuen oroz gaineratik. «Frantziak «euskaldunen oinarritzko eskubideak egunero urratzen ditu», salatu zuen. «Hemen, oso molde bortitzez, euskararen heriotza programatua da». Gainera, Frantziako Estatuak Espainiako Estatuaren jarrerari «era-

bat» segitu ziola eta «errepresioa azkartu» ekarri zuen gogora Larraldek. Bi estatuen «jarrera horiek berdin» jarraitzen dutela salatu zuen. Larraldek, bi estatuen inplikazioa oroitaraziz, Lizarra-Garaziko «akordioaren izaera nazionala» azpimarratu zuen. Lizarra-Garazik «Euskal Herri osoarentzat eskatzen duen irtenbide globalaren beharra» berretsi zuen.

Garaziko agerraldian «jendarmeen aldetik jasandako jazarpena» salatu zuen Batasunak prentsa ohar batean. Herriko etxean prentsaurrekoa ematen ari zirela jendarmeen furgoneta bat zain izan zutela, gero ere inguruan izan zituztela eta errepidera atera bezain pronto bi auto gerarazi eta mahakide zenbait identifikatu zituztela salatu zuten.



ALDE HEMENDIK

**BIHAR DENOK IRUÑERA
NAZIO MANIFESTALDIA**
ARRATSALDEKO 5ETAN, ANTONIUTI PARKETIK

batasuna